

MACROPOLÍGONO INDUSTRIAL DO LIXO EN CARBALLEDA DE AVIA

Luís Díaz Cabanelas*



Actualmente todas as plantas de tratamento de residuos están situadas no norte (Sogama, Nostián, Lousame, As Somozas). É evidente que hai que dar unha solución aos residuos do sur, mais non compartimos o anuncio da Consellería de crear un "macro-polígono industrial do lixo", que eufemisticamente chaman "Parque Medioambiental de Galiza".

Propoñemos como alternativa a creación de plantas de compostaxe comarcais para o tratamento de RSU. Deste xeito descentralizamos a xestión do lixo, diminuimos o custo do transporte e facemos responsable a cada bisbarra da xestión dos seus refugallos aplicando a estratexia dos 3R (reducción, reutilización, reciclaxe).

Rexitamos outras técnicas de tratamento de RSU. A incineración tradicional ou por medio de plasma son fonte importante de emisión de tóxicos á atmosfera. Apostamos pola compostaxe como mellor tecnoloxía. Para os residuos industriais, e tendo en conta que moitos deles son tóxicos e perigosos, aceptaríamos a creación dun polígono especializado. Agora ben, habería que escoller moi ben a localización dese polígono, que tería que gardar a distancia mínima de 2000 metros ata os núcleos de poboación. Tería que dispor da mellor tecnoloxía posibel, e por suposto non debe afectar ao medio ambiente.

Rexitamos a súa localización en Carballeda de Avia por estes mesmos

motivos. Fundamentalmente non garda a distancia regulamentaria ás poboacións, ademais de estar xusto ao carón da captación de auga potábel de Ribadavia, e afectar negativamente o contorno do Santuario de Lodeiro, situado nun ouseiro desde onde se divisaría todo o Parque Industrial. Tamén podería ser incompatible con outras actividades produtivas do Ribeiro, como son a produción de viño de calidade e o turismo.

"O Ribeiro debe ter a súa planta de compostaxe, o mesmo que Vigo, Pontevedra e Ourense, pero Carballeda de Avia non é o lugar axeitado para o tratamento de refugallos industriais"

A oposición veciñal está fundamentada nestes argumentos. O colectivo "Temos Dereito a Saber" ten realizado unha forte campaña informativa mediante charlas, pegada de carteis, etc., pois a xente da comarca estaba desinformada debido a ambigüidade da información oficial centrada fundamentalmente na oferta de postos de traballo.

Segundo a información oficial transmitida pola Consellaría de Medio Ambiente, o parque empresarial trataría os seguintes tipos de residuos: RSU, aceites vexetais e minerais, aparellos eléctricos e electrónicos, disolventes,

metais e compostos metálicos, pneumáticos fóra de uso, papel e cartón, plásticos, tóner e cartuchos de tinta de impresión, ácidos, álcalis e lodos de depuradoras.

Falan de rexitar a incineración e de utilizar tecnoloxías limpas. Pero a día de hoxe descoñecemos cales van a ser as tecnoloxías utilizadas polas empresas que se sitúen no polígono. O simple almacenamento de residuos perigosos como os disolventes e aceites minerais non se pode facer tan preto de onde vive a xente. Temos ainda a lembranza do accidente químico de Caldas, onde o incendio dun almacén de disolventes provocou unha nube tóxica, contaminou gravemente as augas do río Umia e deixou sen auga potábel a gran parte da bisbarra de Arousa.

Consideramos que o Ribeiro debe ter a súa planta de compostaxe, o mesmo que Vigo, Pontevedra e Ourense, pero Carballeda de Avia non é o lugar axeitado para o tratamento de refugallos industriais.

Solicitamos que se faga un plano de xestión de refugallos de Galiza contando co movemento ecoloxista, un plano con tratamentos descentralizados, aplicando as mellores tecnoloxías posíveis, e gardando as distancias regulamentarias.

* Luís Díaz Cabanelas é vocal de Saúde ambiental e residuos de ADEGA